

MFEFERE UKUT NNYIN
2 Nwɛd Corinth 4:17, 18; 5:1-20.
QYQHỌ UKPEP- NKPỌ 396

Eke Mkparawa

IKỌ IBUOT: “Ke ofuri ukut mmọ enye idighe usua mmọ baba, ndien angel iso esie akanyaña mmọ” (Isaiah 63:9).

Ke Mme Nde Ikipat Esie

Nso idi ukut? Edi akpanikọ nte ke omokut ukut ke ini ọdọñode; edi edieke edade fi “etiñ esaña,” edieke esede fi ke mbio, edieke nditọ ufọk-nwɛd mbufo esuade fi koro afo edide anditiene-Christ, oro edi ukut nko.

Kpa enyiñ oro, anditiene-Christ emi ekotde nnyin, ọwọrọ mbiet Christ, oro edi ndidu uwem nte Jesus okodude, ndien oro asaña ye ukọbọ.

Uwut-Nkpọ Jesus

Ndusuk edieke isede uwem Jesus ke abaña ukpep-nkpọ nnyin mfin, enye eyeñwam nnyin ndibiom “mfefere ukut” ye inemesit, koro okposuk edi nte usuñ emi akanade Enye ke iso okosuñode ke ediwak idomo ye ukut, ndien ke akpatre ada osim mkpa ke krọs, Jesus okosuk odori enyin ke Abasi emi Enye akanamde uduak Esie, oro nko okonyuñ ọnọ Enye inemesit ndiyọ (Mme Hebrew 12:2).

Akpa idomo emi ekedomode Jesus nte Nwɛd Abasi etiñde, ọkọtọñọ ke ini emi Spirit Abasi akadade Enye aka ke akai-ikọt man Satan odomo. Do ke Enye eketre udia uwemeyo aba ye okoneyo aba. Ke Enye ama okokop mmem-idem ye biọñ, Satan ama edi ndidomo Enye.

Edi ntre nko ye nnyin mfin; andidiọk eyedi ebine fi ye ami ke ini itimde ikop mmem-idem, ke ini ikpade mba, ke ini ikopde biọñ. Edi edinam Jesus owut nnyin se ikpanamde ye andidomo man inyene erikan. Jesus eketiñ se idude ke Nwɛd Abasi nte ibọrọ ke abaña idomo andidiọk, ndien Satan efehe. Omokut ke edi ata akpan nkpọ ndikpep mme ikọ ibuot nnyin. Ke ini andidomo edide, ndusuk nte akpa mmọñ, ndinam nnyin isọñ ibuot ye Abasi, Spirit Jehovah eyemenere idaha ke enyọñ abaña enye (Isaiah 59:19); ndien idaha oro edi ikọ Abasi.

Jesus ama ọfiọk ete ke mme idomo or idighe esen. Mmọ edi ebine kpukpru owo, “edi Abasi edi akpanikọ, idinyuñ iyakke edomo mbufo ebe se ukeme mbufo edide; edi Enye eyesiak usuñ ubọhọ ọnọ mbufo ke ufọt idomo, man mbufo ekeme ndibiom enye” (1 Nwɛd Corinth 10:13).

Akamba Utip

Usen kiet ke Jesus ama ọkọdọk ke enyọñ obot, Enye okot mbet Esie onyuñ ọdọhọ ete: “Ọfọfọn ọnọ mmọ eke owo ekọbode mmọ kabaña edinen ido: koro Obio Uboñ Heaven enyene mmọ. Ọfọfọn ọnọ mbufo ke adañemi owo edisuñide mbufo, enyuñ enam mbufo isin-enyin, enyuñ etiñ kpukpru oruk idiok-nkpọ ke nsu edian mbufo kabaña Mi. Edaresit, edara eti-eti; koro utip mbufo ke Heaven omokpon; koro kpa ntre ke mmọ ekenam mme prophet emi ebemde mbufo iso edu isin-enyin” (Matthew 5:10-12). Ke ini efen Enye ete, “Edieke mmọ ekesinde Mi enyin, eyesin mbufo enyin nko” (John 15:20).

Jesus ama ọfiọk ete ke ediwak idomo ye ukut kebet Enye, edi Enye ekenem esit ndinam uduak Abasi.

Edidomo Jesus

Ke ini Jesus akanamde udọñọ okure owo iba emi ekenyenede ndedehe spirit ke idut mme Gadarene, mbio obio oro ema ekpe enye ubọk ete adaha ọkpọñ mmimọ.

Ke ini Enye ekebinde demon onyuñ ọkọk mbon udọñọ ye ukut, mme Pharisee ekebiom Enye ikpe nte Enye emi enyenede ebuana ye andidiọk onyuñ adade odudu Beelzebub ebin ndedehe spirit.

Ke ini mbet Jesus ekekibide ibokpot ke Usen Sabbath, ke ntak ọbiọñ, ñko ke ini Jesus ọkọkọkde owo emi ubọk esie akpade ke usen sabbath, mme Pharisee ekuni ete ke Jesus ikponoke mbet Sabbath.

Mmọ edomo ndida ikọ inua Esie mmum Enye; man ebiom Enye ikpe. Mme Pharisee, mme akwa oku ye mbio owo ema efibe ufup koro Jesus akanamde ediwak utibe-ñkpọ, ndien ediwak mbio obio etiene Enye. Ke akpatre, edi kpa mmọ oro ekeda Enye enọ ete ekọñ ke krọs.

Jesus ama ọyọ kpukpru, kpa idem krọs, ikopke but, koro enye okoyom idara oro enimde enọ enye ke Enye amakanam utom oro Abasi onimde ọnọ Enye ama.

Uwut-Ñkpọ Paul

Paul ñko, ama ọfiọk ete ke ediwak idomo ye ukut kebet imọ, koro Ọbọñ ama ọdọhọ ete, “ami nyewut enye adaña ediwak ñkpọ nte enye enyenede ndikut kabaña enyiñ Mi.” Paul ama adara ke idaha kiet ekededi ke uwem, koro enye ọkọfiọkde ete ke Jesus eyekpeme ke idude ke ukut. Jesus ama ọfiọk nte mbiomo esie odobide koro Enye ama okut oruk ukut oro. Ke nditiñ mbaña Jesus, mme ntiense emi ekedude ke ini Isaiah, Ñwed Abasi ọdọhọ ete, “Ke ofuri ukut mmọ enye idighe usua mmọ baba, ndien angel iso esie akanyaña mmọ.”

Paul etiñ abaña “mfefere ukut.” Enye ikekereke ite ke edi ọkpọsọñ ndisaña mbe ke ubom ndisip, nditọñ ke itiat, ndimia ke ikpa, ndikut afanikọñ ke akpa, ndikut afanikọñ ke otu nditọ-ete abiaña, ọkpọsọñ utom ye eñwan, akam ye ntre-udia, tuel ye unana edisine-ñkpọ kpa ye edidu ke ufọk-ñkpọkọbi man ọkwọrọ Jesus ọnọ mme owo, koro Abasi ama eyet enye aran ete ọkwọrọ, ndien okonyuñ edi inemesit Paul ndinam se Abasi okoyomde enye anam.

Ndinem Abasi Esit

Ke ini idomo edide nnyin iti Jesus. Enye ikoyomke inemesit ererimbot emi. Enye okoyom ndinem Abasi ete Esie esit.

Ndusuk nditọ iren ye iban eñwana ndinọ idem mmọ ye mme ufan mmọ ke ererimbot inemesit. Ndusuk ini nditọ iban esibe idet mmọ enyuñ etuk iso mmọ koro mme ufan mmọ enamde ntre, ndusuk ini nditọ iren ñko eyara anyan idet ke usuñ eke mifonke koro edide ido usine-ñkpọ eyo emi.

Edieke esede nnyin ke mbio enyuñ esakde nsahi koro nnyin minamke mme ñkpọ oro mbon ererimbot enamde, ti ete ke Jesus, “emi okokutde idomo ke kpukpru nde kpa nte nnyin, edi minyeneke idiọk-ñkpọ” (Mme Hebrew 4:15). Enye ọfiọk nte akparawa eren mme ñwan okutde ukut ke ini idomo edide, ndien Enye etie ke ubọk nnasia Abasi Ete ke Heaven kpa idahaemi, ndibeñe Abasi ete ọnọ fi ukeme ye odudu ke ntak Imọ.

Ke Ufọn Nnyin

Nte afo akanam emekere ntak emi afo ọdọñode mme ntak emi ñkpọsọñ idomo osimde fi? Edieke afo edide owo Abasi, edi koro Abasi ama fi onyuñ oyom fi asana nte Enye asanade. Ediwak ukut ekpep nnyin ndime ime. Mmọ ekpep nnyin ndinyene mbom nnọ mmọ emi ekutde ukut. Mmọ esọñọ mbuqtidem nnyin. Jesus akañwam nnyin ke idomo kiet, ndien oro ọnọ nnyin mbuqtidem ndinim ke akpanikọ nte ke Enye eyeñwam nnyin ke idomo efen. Ediwak idomo eñwam eyen Abasi nditi nte Jesus ọkọbode ufen ọnọ enye.

Nnyin idara koro Abasi ama nnyin osim idaha nte ọtunode nnyin. Nnyin ikemeke ndidi nti nditọ ke ererimbot emi ibọhọke mme andinyene nnyin etunọ nnyin. Nnyin inyuñ ikemeke ndidi nti mme anditiene-Christ ibọhọke Abasi ọtunọ nnyin.

Edibemiso Ntabi

Paul ama ọfiọk ete ke okposuk edi nte imọ ikpodude uwem isua ikie, ini eke imọ idude mi edi esisit ke edade edomo mme emana ye mme emana emi utit miduhe emi ididude ye Ufan ye Andinyaña esie. Abasi ama anam enye atabi idara Heaven ke ini ekedade enye eka Paradise. Abasi anam nnyin itabi idara Heaven oto ke inem Spirit emi oduñde ke esit nnyin.

Ndusuk ini Jesus otim ekpere onyũn ọfọn ye nnyin nte ikpamade ndidọk ke Heaven ndidu ye Enye ini kiet. Ekeme ndidi Paul ama ekere ntre, nte enye osuk ekerede abaña ini emi edikpọnde “ataya” esie ndidu ke “ufọk eke odude ke Heaven.”

Akpatre Nduñọre

Paul ekemek ndikpọn uwem ererimbot emi man odu ye Ọbọn edi enye ama ọfiọk ete edieke imọ idude uwem tutu Jesus edi me ikpade, ke imọ inyene ndinam nkpọ nnọ Ọbọn ke ofuri esit kpukpru usen. Usen kiet enye eyeda ke iso itie ikpe Christ onyũn anam ibat uwem esie.

Nnyin kiet-kiet, ke idide anditiene-Chris me anam-idiọk, iyenam ibat uwem nnyin inọ Abasi ke kpukpru se nnyin ikanamde ke uwem emi.

Kpukpru usen imenyene ufañ ndinam eti nkpọ nnọ owo efen, ikese ufan eke ọdọnde, ifọn ido ye mbọhiduñ nnyin inyũn isuk ibuat inọ ete ye eka nnyin ke ọyọhọ inemesit nte emi Jesus ke Idemesie okpoyomde nnyin inam. Jesus ọkọdọhọ ete ke nnyin iyebọ utip ke kọp mbit-mbit mmọn kiet emi nnyin inọde ke Enyiñ Imọ. Enyene ndinam kpukpru nkpọ emi nte enam enọ Jesus edieke iyomde ndibọ utip. Nnyin idibọhọ utip ito Heaven ke mme nkpọ oro nnyin inamde iyom itoro ito mmọ oro esede nnyin.

Eyak nnyin ikpep nte Paul ekepepe ke abaña akpatre nduñọre emi edisimde nnyin usen kiet. Kpa nte nnyin ikpepe nkpọ inọ udomo ufọk-nwede, eyak nnyin ikpep nwede-ukpep-nkpọ Abasi, Nwede Abasi, man ifiọk uduak Esie, inyũn ibọn akam man Enye ańwam nnyin ndinanam se ikpepepe ibaña uduak Esie ke usen ke usen.

Eyak nnyin ibiom ye idaresit ke ntak Jesus, “mfefere ukut” emi edide ke usuñ nnyin, inyũn inam mme nkpọ oro nnyin ikerede ke esit nnyin ite ke Abasi oyom nnyin inam. “Koro kpukpru nnyin inyene ndiwọrọ nyarade ke iso itie-ikpe Christ, man owo kiet kiet ọbọ utip eke ekemde ye se enye akanamde ke ikpọhidem, ye nkpọ oro edide eti, ye onyũn edide idiọk.”

MME MBUME

- 1 Nsi idi “mfefere ukut” emi Paul etiñde abaña?
- 2 Edieke ibiomde mme ukut nnyin ke idaresit nte inam inọ Jesus, nso ididi utip nnyin?
- 3 Nso idi “ataya” emi Paul etiñde abaña?
- 4 Paul okoyom esine imọ nso ke ini ataya ererimbot emi owurede?
- 5 Nso ke Abasi ọnọ nnyin emi osiode ndik mkpa ke nnyin efep?
- 6 Nso idi ntak emi nnyin ikpade utom, mme ikpepepe nkpọ inam man Christ ọfiọk nnyin?
- 7 Nnyin idiwọrọ iyarade ke mmọn usen kiet?
- 8 Nso ke nnyin idibọ ke ini idiwọrọde iyarade ke iso itie-ikpe Christ?